

四庫全書

集部

欽定四庫全書

盤洲文集卷四十七

宋 洪适 撰

章奏七

繳太史局轉官劄子

十月初三日批旨楊覺民等轉官恩例候試補直長

了日  
叔使

臣准中書門下省送到錄黃一道為太史局靈臺郎楊覺民等四人依醫官能說例該遇覃恩轉官今臣書行

者右臣取會到太史局遷轉資格自局令至直長共九階並係十年無過犯方許下磨勘諸靈臺郎滿二年遇直長有闕必須試歷算科方許轉行近者朝請至中奉大夫該遇覃恩亦曾引例得轉行一官因臣闕論列並作減四年磨勘其伎術官於赦文中初無轉官之文而靈臺郎必須經試方可轉直長縱使合轉一官正與朝請大夫以上一同若輒攀醫官例暗得轉行則為靈臺郎闕盡皆不試而遷誠為冒濫今來欲乞將楊覺民等

依武臣轉官法與減五年磨勘所有錄黃臣未敢書行  
謹錄奏聞伏候勅旨

繳侯進詞頭劄子

十月十二日御筆依奏三省  
進呈委方滋根究詣實具情

犯聞  
奏

臣准中書省送到武功大夫鎮江水軍統領侯進降官  
詞頭令臣撰詞進入臣昨在鎮江守官聞軍中稱說侯  
進帶官錢五萬貫往湖北買木數年無歸意就峽州宜  
都縣起造大第招聚倡樂宴會奢侈縱使兵卒陵虐居

民奪其物產用竹纜馬船橫截江流聲鼓鳴鑼邀遮客  
旅決打號令強拘簾筏一方苦之甚於豺虎都統官累  
魯催督遷延不回今係荆南帥臣李道因民旅陳狀告  
訴不法事件及校尉胡振甘反坐之罪訴其聚集亡命  
圖畫入川地形恐有不測李道備申朝廷送提刑司差  
官體究雖多從闊畧而攔截客旅等事並是詣實戶刑  
部看詳恐追人路遠淹延刑禁遂降一官放罷臣竊見  
聖斷方欲痛治姦賊之吏如侯進以官錘數萬緡逗留

不歸肆其兇暴少有此比兼李道申侯進初到便經帥  
司陳狀乞將民間夾江林木盡行批號倒伐不許占恠  
帥司不從至於出榜禁約可見無所忌憚只降一官太  
為輕典今若釋其害民之罪則侵盜官錢所不可縱臣  
愚欲乞行下都統司抄籍家資令荆南帥司拘收屋業  
送就近鎮江府取索干照根究錢物依新降指揮斷罪  
施行所有制詞臣未敢撰入取進止

繳王之望結局轉官劄子

十一月四日當晚進  
八次早御筆依奏

臣伏覩十月二十六日指揮淮西宣諭司結局其官吏  
軍兵並依汪澈例等第推賞令開具申尚書省取旨臣  
伏見汪澈督師襄漢之時強敵對壘嘗交鋒刃一行官  
吏頗亦憂危及寇退師還以次行賞第一等轉兩官第  
二等轉一官更減二年磨勘第三等轉一官選人亦有  
改官者當時清議尚以為過今歲淮西外無邊警如一  
府官吏坐受恩賞竊恐屯戍之人不無怨望倘俟其開  
具姓名始行封繳不若寢之於未然庶幾免開徼幸之

端所有前降指揮臣雖已書行欲望聖斷更賜詳酌施行

繳李迥差遣劄子

十一月七日  
御筆將上

臣准中書門下省送到錄黃一道右宣教郎李迥差監行在左藏東庫臣伏覩見行條制初改官人惟有出身許授學官其餘必須注授知縣親民差遣蓋慮仕進之人不歷州縣他時除用不能通曉民事此萬世不易之良法也間或夤緣干請有得宮觀以脫親民之官者公

議猶或非之今李迥係用臣總領所薦舉文字於今年八月改秩若便作京局釐務官則破法起例益自此始雖係臣門生難以容私緘默所有錄黃臣不敢書行取進止

繳王若鈇用居廣恩例劄子

十一月十一日御筆依奏

臣准中書門下省送到錄黃一道皇兄岳陽軍節度使居廣乞以初除開府儀同三司合得親屬占射差遣恩例與將仕郎王若鈇收使十一月八日奉聖旨差監文

思院上界臣仰惟陛下以任子之兄尚思更張之術今  
必令銓試入官乃所以使世祿之家頗知務學不敢徼  
幸門蔭便萌彈冠之心檢照隆興元年四月指揮初出  
官選人不許用父祖親戚應合得恩澤免試雖見任宰  
執亦不許陳乞回授若放行王若鈇一人則繼踵而來  
無以救官冗之弊矣欲望聖斷特賜追寢已降指揮所  
有錄黃臣不敢書行取進止

繳巫役召命劄子

十一月十九日上即日  
御筆依奏封付洪泉

臣准中書門下省送到錄黃一道十一月十八日奉聖  
旨巫伋陳俊卿呂廣問王時升並召赴行在臣伏見春  
秋之時諸侯互相爭戰其覘國者不論其地之大小兵  
之強弱惟視其人材如何故朝多君子則敵不敢伐茲  
已然之明驗也如巫伋者才學識見政事操履畧無一  
長徒以諂事秦檜為之鷹犬故能躡取大官今廢退十  
年議者不以為屈寄寓無錫縣專以私酤為生裒聚無  
賴為害一邑方多事之際雖販繒屠狗之人果有所長

亦不應棄若其無用何所取材雖云嘗為執政有此虛稱初無時望品其人物誰不過之召節一馳取笑中外秦檜殘黨如汪勃章俊宋樸之徒與俊初無優劣近因言者奪其三人復職若俊狀召則勃俊之流人皆冀其復用矣伏望聖慈特賜鑒察所有錄黃臣未敢書行取進止

繳汪汝嘉等差遣劄子

閏十一月六日  
當日御筆依奏

臣准中書門下省送到閏十一月二日錄黃一道數內

汪汝嘉差知荆門軍李琛差知永州宇文仔差知邛州  
臣伏見汪汝嘉昨因手刃表弟李穎停官編管數年之  
後交結秦檜親黨復還仕版幹辦諸軍審計日常躬親  
梓殿公吏遭臺章放罷稟性兇麤不知懲創李琛之守  
婺州專以刻剝為政苞苴秦檜之門恃勢妄作減剋軍  
兵請給幾至生變郡人有寧與猛虎遊莫遇李婺州之  
語劾罷已久自知潛伏今已七十有餘耄昏戒得宇文  
仔新授果州通判意欲別營差遣妄訴於都堂稱有女

嫁知州丁訥之子合行迴避省部送本路勘會詣實未到間有丁訥之弟丁顏亦訴於朝稱兄訥本京東人寄居湖州三子皆未娶本宗並無人與宇文氏連姻妄冒如此何以臨民臣愚欲乞令汪汝嘉李琛終滿今任宮觀宇文仔依舊果州新任差遣所有錄黃臣未敢書行取進止

繳趙密恩數劄子

閏月八日當  
日御筆依奏

臣准中書門下省送到錄黃一道閏十一月六日奉聖

旨趙密已除少保依前崇信軍節度使落致仕權殿前  
司職事所有合得恩數等並依楊存中昨除少保日已  
得指揮施行臣取會省部條格即無三少初除恩數向  
來楊存中係特降指揮依簽書樞密院事例今來趙密  
元因致仕得除少保近之再任議者謂當納還三少始  
缺

者則謂其權掌禁兵若三衙休息諸帥回歸  
密必依舊請老雖不納少保可也今若無故而輒依前  
比後省闕緘默放行恐不免於清議所有錄黃臣未敢

書行取進止

繳莫汲編修官劄子

閏月十二日  
次日御筆依奏

臣准中書門下省送到錄黃一道閏十一月十二日三省同奉聖旨莫汲除樞密院編修官臣伏見秦檜專權之久至其末年欲禽取天下賢士大夫而誅戮之檜雖奮殺人之心必有負屠宰之材蘊虎狼之性挾戈矛之刃者為其用而檜之志始可逞也張常先之謀張宗元莫汲汪召錫之圖趙令衿凡是數人適檜之死令衿輩

始免於刑戮太上皇帝更化之初即日竄之嶺海天下之人以比四凶陛下踐阼覃曠蕩之澤此輩始得生還正當奉頭鼠伏杜門苟活不自齒於薦紳可也雖古有使過之文朝廷杖拭丹書何時無之至若此等凶人縱使有荀孟之學班馬之文亦不可以其才而復用蓋廢錮一人使世之嗜進喜禍者不敢萌吞噬忠良之計所以銷姦賊於未然之前也

闕

者雖以試藝登高第而

不自愛

闕

碌碌州縣塵埃之職猶

之可也關

入中都列屬西府而出入省掖從

容宰輔之間耶除命一出衆論必駭臣不敢避怨為人  
禁害使後之士有以懲戒覆車之轍而修為君子之歸  
也辟猶虎豹豺狼當放之於深山廣谷之中若置之苑  
囿則騰擲圈檻不可復制矣所有錄黃臣不敢書行取  
進止

繳余堯弼職名劄子

閏月十四日當  
日御筆依奏

臣准中書門下省送到錄黃一道信州奏左中大夫余

堯弼為筋力衰憊不敢久竊祠祿乞守本官致仕閏十一月十三日奉聖旨復龍圖閣學士致仕令臣書行者臣伏見章俊因致仕復龍圖閣學士言者論列併與汪勃宋樸而奪之今纔數月爾堯弼復託疾請老亦得此職夫老龍之去端明一間耳異時執政無瑕而退僅得端殿豈有積愆久廢之人一命遂居六閣學士之首者此除若行則同類者又將羣起而不可遏在秦檜時堯弼以臺諫而為鷹犬坐政事堂而伴食其無用而易制

蓋勅俊一流人也今勅俊失之於前而堯弼得之於後  
一予一奪有損陛下總核之政是使齷齪之士知可以  
竊位於一時而不妨叨榮於末路則隳喪名節爭巧宦  
以希進矣所有錄黃臣不敢書行取進止

繳莫汲計議官劄子

閏月二十四日次日  
御筆改幹辦公事

臣近於今月十二日以莫汲除樞密院編修官嘗論其  
謀殺趙令衿之罪具劄子封駁即蒙御筆依奏繼有沈  
介薦章稱其智畧縱橫才力明敏乞授一光州差遣或

制置司職任使之招諭皇甫個餘軍及收復光州伏覩御筆莫汲可差充沈介屬官至二十日執政批旨却作勘會湖北京西制置司合差參議官二員奉聖旨莫汲差充計議官候立功效日陞擢所有莫汲過愆臣不復縷數以瀆天聽但汲元係左從事郎坐罪編管化州更大赦放令逐便臣取會吏刑部赦後即不曾叙復元官自用兵以來有都督府樞密督視府江淮宣撫司荆襄制置司川峽及兩淮宣諭司若宰執開幕府則從官作

參贊其他官屬則有參議多係卿少郎官及魯歷監司  
郡守者為之其次則有幹辦公事准備差遣應是選人  
只作准備差遣近歲莫汲在虞允文制置司亦是准備  
差遣今忽超躡常制新立官稱聞者驚異其事自來臺  
諫彈擊給舍繳駁之人未嘗隨踵収用或有他時澡濯  
而起者其初必與降等差遣蓋示洗垢棄瑕之漸今汲  
因臣封駁反升等創置官名以寵之又許以他日陞擢  
則臣語言妄發實有不合封駁之罪雖蒙聖度優容臣

實何顏尚居禁掖臣等侍朝殿乞對已三日居家自訟  
不敢入省欲望聖慈特賜黜責庶幾後日居兩省者不  
敢輕議朝廷用人得以懲戒冒犯天威臣不勝戰汗之  
至取進止

盤洲文集卷四十七

欽定四庫全書

盤洲文集卷四十八

宋 洪适 撰

章奏八

繳張訓通復官劄子

乾道元年四月三十日

臣准中書門下省送到詞頭一道刑部檢舉到張訓通叙官元係張俊奏宿州之役初非戰敗而統制官等無故引歸殿前司統制官張訓通係軍馬入城之際先次

一面引歸欲望酌情定罪明賜貶降奉聖旨張訓通降  
四官本部看詳依條合自降斷勅日每理再期一官本  
人期限未滿間該遇赦恩合叙一官元係正侍大夫和  
州防禦使因罪降授協忠大夫果州團練使奉聖旨依  
所申於階官上與叙令臣命詞給告臣伏見張訓通弓  
矢鞍馬漫無寸長怯懦不武又無與為比但能涉獵七  
書百將傳藉此以為談柄隸鄂州軍籍之日與田師中  
典掌財物背公營私叨冒官秩至於橫行遙郡符離之

役首先遁逃原情定罪戮之市朝如孔福可也既從輕  
典鑄官自効有司却與尋常罪犯之人會赦便與叙復  
竊懼無以懲戒將士臣愚欲乞將張訓通同罪之人並  
候軍前顯立功效之日大將保明取特旨方許牽復庶  
使從軍之人咸知復玷缺之艱難不敢愛身誤國所有  
詞頭臣未敢撰述取進止

繳秦壩宮觀劄子

五月一日  
即日依奏

臣准中書門下省送到錄黃一道敦文閣直學士右朝

散郎秦垞狀昨自春官得請奉祠滿罷之後游經憂患  
累重仰祿欲望特差宮觀一次奉聖旨差提舉江州太  
平興國宮臣嘗讀唐明皇實錄載李林甫身死之後朝  
廷治其積愆諸子俱配流嶺南家口隨之每房各與奴  
婢三兩人并緣身衣服飲食自餘資產一切官收臣竊  
謂秦檜藏奸稔惡天下之人戶知之大網不容使之自  
斃厥妻厥子繼踵淪亡不肖之孫官職如故華屋厚藏  
可謂幸矣為之計者政當恐懼屏迹不復自伍於縉紳

之間今乃無所忌憚尚敢陳乞差違雖宮觀甚小在有  
罪者得之則人以為除用之漸臣懼秦檜黨與牽連相  
慶自此皆有彈冠之心所謂一葉不去將尋斧柯者矣  
況當國用不足而秦氏之家金珠充牣國家既已貸而  
不籍凡前此教坊所汰之人頃皆養之於家以奉歌酒  
之歡乃稱累重仰祿其公然欺世玩侮朝廷有如此者  
臣愚欲望聖慈將秦頃宮觀指揮更不施行所有錄黃  
臣未敢書行取進止

繳潘粹卿恩澤劄子

五月三日

臣准中書門下省送到錄黃一道潘粹卿乞放行改奏葉旁作恩澤事奉聖旨特令吏部放行令臣書行者右臣取到前件公案拖照得潘粹卿將父遺表恩澤奏補胡備於紹興二十六年十月內降勅據本人稱胡備未受勅間於紹興二十七年三月內身死本人於當年十二月內陳乞改奏與弟清卿於團練使上轉行吏部檢坐條法只合作減年收使本人至紹興二十九年四月

內却經臨安府改奏異姓無服人葉旁作吏部節缺告  
示出違條限委是允當兼胡備當來勅命係身亡後旋  
行寄納闕稱未曾受已是詐偽今來陳訴曾於限內  
陳乞係是乞與潘清卿轉官即非限內曾行陳乞奏補  
今若特令吏部放行則是條法無用所有錄黃臣未敢  
書行取進止

繳梁俊彥推賞劄子

五月六日次  
日御筆並依

臣准中書門下省送到錄黃一道五月四日奉聖旨梁

俊彥合該軍器所皇城司酬賞可依正月六日四月七日已降指揮施行令臣書行者右臣竊見正月內軍器所推賞指揮官吏轉一官資礙止法人特與轉行不及全年人總計推賞繼因臣寮論列至今年六月實及二年方合陳乞四月內皇城司推賞初降指揮梁俊彥特轉右武大夫續降指揮令依例回授今來疊前兩賞並依已降指揮有司未知所從若用正月六日指揮即歲月未滿有礙條例若用四月七日指揮即已令回授無

可施行臣愚以謂爵賞天下之砥石所以厲世磨鈍惟其明白而無偏私則僥倖之計不萌觖望之心不作自來正使礙止法之人有特旨方轉行遙刺至防禦使方轉過橫行所有皇城司被賞人宋鈞宋直溫皆是正使轉行遙刺梁俊彥亦是正使與逐人一般前降指揮獨與超轉橫行則為太優後降指揮却令回授又似未當臣欲乞將梁俊彥皇城司賞典依宋鈞宋直溫例與轉行遙刺其軍器所賞典即候關月內合該陳乞之時照

應在職年月依條別與施行庶幾慶賞均一指揮明白  
無復偏私之弊輿人不得而議所有錄黃臣未敢書行  
取進止

繳沈介不允詔劄子

五月十三日當日御筆荆襄上流為重兩帥頗多下

協雖軍務稍靜尚須調護且依已降指揮流行

臣准中書門下省送到錄黃一道湖北京西制置使沈  
介奏為寒濕所中動作艱難心氣發動臨事繆忘乞解  
職終喪奉聖旨不允令學士院降詔不得再有陳請令

臣書行者右臣聞父母之喪三年不從政禮法當然孔子答子夏之問曰君子不奪人之喪亦不可奪喪也金革之事無避亦聖門之所不與頃以軍興起沈介於苦廬付以方面之寄介入國門而邊事漸已講解繼而信使交馳兵戍各已休息自都督府及招撫使之類皆已上印綬結局矣獨荆襄制司幕府如故一司官吏徒耗俸廩其所辟置又屢為臣僚封還況介之事親嘗絰清議今舉朝斷斷以介不終喪為非朝廷若欲成人之美

不當以其稱病為文具而過其請若更留數月雖介有  
凱風寒泉之思無以伸其志使之重得罪於名教非所  
以愛惜人材也臣愚欲望聖慈許其解職終喪俾全人  
子之道則移孝為忠可以責其異日之報所有錄黃臣  
未敢書行取進止

貼黃 臣前件所陳若蒙聖斷施行所有制置司官  
吏即乞依都督府例結局罷散伏取聖裁

繳薛良朋等賑濟賞劄子

五月二十四日與給事中王時外同繳當

日批出辭  
免依所乞

臣等准中書門下省送到錄黃一道薛良朋姜詵韓彥  
古辭免賑濟進職轉官奉聖旨依指揮不允令臣等書  
讀者右臣等聞仁宗朝富弼守青州河朔大水民流京  
東弼行賑濟之策所活人至五十餘萬近世荒政之修  
無以加此繼而遣使勞弼即拜禮部侍郎而弼辭曰救  
災守臣職也卒不受今賑濟之術比之於弼固相萬萬  
陛下聖心焦勞非不切至然城都之外死亡之人亦不

為少流尸滿川衆目所覩城中之人至於不食魚鰕而  
三人者並皆遷官進職衆論以為未當夫建立百官所  
以為民不幸而有災傷又因而冒賞則監司守令之職  
果安在耶今三人者自知不安力具辭免若與從其所  
請則朝廷不失為民行賞而良朋等亦得受辭之正況  
今所在災傷不止一處若三人受賞不辭而浙西諸郡  
守令及被差官吏實緣覲覲殆且數十百人而未止當  
此天災而反行濫賞豈所謂修政事以答天變者哉臣

等伏望聖慈特賜睿斷將良朋等辭免進職轉官並依所乞施行所有錄黃臣等未敢書牘取進止

繳王彥宣借人劄子

五月二十五日  
次日御筆依奏

臣准中書門下省送到錄黃一道保平軍節度使提舉  
太平興國宮王彥乞破行宣借人五十名及乞更破使  
臣五名奉聖旨依令臣書行者右臣竊聞王彥近罷建  
康管軍有自來親隨西兵三百人朝廷從其所請許存  
留五十人餘者發回原來去處及發回之日有其數而

無其人者凡百輩則其久握兵權詭請虛券殆不知其  
幾何人也今猶貪憚未已所乞宣借五十人及使臣五  
名已蒙聖慈依許臣取到吏兵部狀節度使任宮觀合  
破宣借十五人因紹興三十二年指揮已行減半及依  
例只許踏逐指使一名申朝廷差撥彥之專閫於江淮  
無尺寸功得以節鉞奉祠幸矣尚此苟得

闕

難默

默本人已有存留親兵五十人自當理為宣借之數若  
聖恩從厚只合依條例占破難以過數陳乞所有錄黃

臣未敢書行取進止

再繳韓彥古劄子

五月二十五日上六月一日以彥古自請與外任

臣等准中書門下省送到錄黃一道韓彥古辭免轉官  
依所乞者右臣等近為城外飢民死者盈川羣目所視  
而官吏以賑濟有勞全活甚衆推賞嘗輒具管見特蒙  
聖慈曲賜開納朝廷已用逐人辭免依所乞臣等亦已  
置而不論其間有韓彥古申狀乃云伏念彥古至愚極  
陋之資非不知朝廷機務之煩聖恩不可屢鬱特以冒

詩人胡顏之刺寧甘以黷而羣言之難犯有甚批鱗況何功苦之足言需此寵章之驟至與其他日險膚之見詆孰若從容力祈之為優且省也伏望朝廷蚤賜追寢庶幾小人母得而議臣等觀其辭語險怪豈可陳於君父之前播之四方豈不傳以為笑封繳之官乃輒指為小人而謂公論為險偽膚受之言若臣等以小人而妄議陛下不應聽從既蒙施行而被繳之人乃無所忌憚公然見詆如此不惟桀驁不遜輕侮朝廷臣等不材備

位後省實難以振職所有錄黃并彥古申狀隨狀繳奏  
伏望聖斷特賜施行

貼黃 臣等伏聞彥古昨除提舉官遭臣寮封繳自  
稱當論訴於朝廷臣等竊謂郎曹清班豈容此輩冒  
居伏乞聖察

繳馬監官轉官劄子


六月  
七日

臣准中書門下省送到錄黃一道奉聖旨牧馬皆可依  
累降指揮推恩崔良輔特於遙郡上轉行一官李楷王

貴劉彥趙昌蘇信曹繹並轉一官姜子興陳邦俊並補  
進武校尉人吏轉一官候出職日收使臣取到崔良輔  
脚色及紹興二十一年以後馬監推賞體例照得本人  
紹興十七年初管馬監之時只係武翼郎二十年間因  
管幹有勞八次遷官一次用賞出給料錢歷自副使轉  
橫行又轉選郡至於右武大夫觀察使今又該轉承宣  
使恩賞僥濫無甚於此臣近因奏對及軍中賞典仰見  
聖慮宏遠愛惜名器非有功者不與今不知馬監每兩

年之內孳長若干而十餘人遷轉至有白身補官者如  
崔良輔數十年不徙職常法磨勘之外兩年一遷雖橫  
行遙郡唾手而得自以謂例當然也今隸籍軍門若非  
出戍用兵寄命鋒刃之下而有斬將搴旗之功者無緣  
有此醲賞況祖宗成法在京官司因職任推賞之人若  
或再任則不重賞今馬監遷官雖是舊例蓋有司失於  
建明不魯有所搏節因循不革流弊至此臣愚欲乞裁  
以中道應馬監官如已三經推賞則後來賞典並與減

半欲望睿斷更賜處分如是允當即乞立為成法及其  
他官司賞典亦乞令大臣討論裁損其取到紹興二十  
一年以後指揮錄連在前所有錄黃臣未敢書行取進  
止



欽定四庫全書

集部

盤洲文集卷

四十九至  
五十六

詳校官庶吉士

臣初喬齡

主事

臣呂雲棟覆勘

總校官編修

臣

王燕緒

校對官中書

臣

李斯咏

謄錄監生

臣

杜鋒

欽定四庫全書

盤洲文集卷四十九

宋 洪适 撰

章奏九

荊門軍奏便民五事狀

臣伏覩紹興三年二月二十八日手詔應諸路守臣到任及半年以上先具民間利病或邊防五事聞奏臣恭惟陛下勤恤民隱出於天性臣以駑獘叨乘障之寄仰

體陛下愛民之心不敢以不可施行之事徒塞詔旨臣  
自到任訪之於民云荆襄頃為盜區魚肉其民最甚凋  
殘之餘實與淮南無異今田畝既已起稅而逐年又有  
均敷茶額錢所出甚於夏秋常賦致使茶商執害民之  
柄而託吏為姦不惟民力重困又緣此不敢歸業數十  
年間所以民未加益并官田以附種為名而不稼納租  
麴引失立法之意而重疊出錙大禮代侘州之貢而多  
方取辦皆不便於民者臣雖到任未及半年緣茶事所

不可緩臣謹條次下項

一臣所謂茶商執害民之柄而託吏為姦者蓋江浙他路俱有茶額而食焉者衆商人隨時賣價四民不以為病惟創瘼之地戶口耗減而凋傷困乏蓋不能頓頓食茶如荆門軍又緣異時官吏不以疲民為念所圖溢額受賞歲增加至於數多若奉行前後朝廷指揮令客人從便交易則定額必致虧減官吏當有責罰本軍昨來遂

以人戶為率計口均數如家有一丁則歲受茶  
三斤其丁多及老小者以次增減至有一家買  
十三斤者行之將及十年豪商與猾吏通謀為  
姦其弊不一今荊門兩縣之民其客戶往來不  
常外主戶纔及三千坊郭不滿五百家遞年赴  
茶四百六十引客人就官入納每茶一斤為錢  
一百八十一文足就旁近土產處買下等粗茶  
雜以木葉每斤不直百文却逐年定價令民戶

每斤還五百三十文足會計本軍歲額官得客  
人入納錢一萬七百貫有畸而民間償客乃費  
三萬一千七百貫凡客人賣引到縣指定所欲  
賣茶鄉分乞留元引只以縣帖下鄉稱某客販  
到若干引令耆保差大小保長門到戶至應主  
客戶并計口均敷或猾吏暗增引數或豪商均  
茶已足計託牙駟妄稱人丁逃徙差互發賣未  
足乞改別鄉吏既受賂更不覈實又與分下別

鄉或不即時批鑿元引致容往來影帶私販或先以私茶憑牙駟欺民均賣續用縣帖再勒依數認買若爭拒不受客即委棄於地而去不惟疲民費錢重疊而遞年損折入納錢亦不為少皆緣歲額過多不敷則無由可辦商執其柄又以高價邀於官而求售在官者懼譴乃復黽勉曲從而滋蔓吏姦公私俱病臣比因草奏遂點檢倚郭縣二十八年內都保承受縣帖均分茶

數已足而繳到客引尚多虧數縣吏却稱自均  
敷以來逐年遞趲以次年春夏季補充前一年  
之數蓋酒稅場務日生課利容有前後趲補今  
既將丁口敷茶民間出錢已滿歲額而官引却  
有虧失者蓋是承襲作弊如前所陳臣已究治  
縣吏勒令填補榜示見行條法及續降寬恤指  
揮自今更不違法均敷但常額尚存則實惠難  
行若不控告朝廷剗草此弊則疲民困窮未能

休息臣愚欲望聖慈憐念遠人許令荊門軍紹興二十九年只以客人從便實住賣到茶數立為新額或乞以見今歲額特賜蠲減一半庶幾易於赴辦則害民之柄不在茶商茶商不能確執高價自然從便交易是寬恤之澤實及千里一二年間必有增戶之效

一臣所謂官田以附種為名而不稼納租者其一曰營田其一曰學糧田所謂營田者前此邑官

緣以營田結銜既上司督責即指荒閒田土稱  
為官莊初不遵依元降指揮修葺屋宇置造農  
具召人耕作便行追集稅戶以物力多寡勒令  
認租謂之附種營田至兩年一替供糾本鄉未  
曾附種之戶輪次認納吏緣為姦轉更教令糾  
扶善良每一戶替免至於追逮五七戶紛拏推  
託賄賂公行源源不絕舉縣咸被其擾遇新至  
之戶或乍佃荒田或只請住基而見充附種之

人已投狀措令承代故有犁鋤未到畎畝茅茨  
未庇風雨而營田官課已遭督責臣伏見前郊  
赦文放免都督府官莊蓋是朝廷已知其弊今  
荆門軍長林縣高陽兩莊當陽縣山口莊所名  
營田係安撫司專差官兵耕作即是良田實收  
課利并長林縣車橋兩處亦有官兵營田當陽  
縣只有四戶開耕實田外其他兩縣營田共一  
千七十七戶所納秋課自五斗有至於四十二

石者共一千八百餘石又有夏料小麥在外並  
是無田認納臣不住據人戶訴稱所認課子逐  
年并是尉司弓手攬納每石有費錢三千者每  
戶各有小麥七升亦有費錢一千者即是稅工  
起稅實為重疊臣愚欲望聖慈行下將實有官  
田耕種去處依舊存留外其虛名營田勒人戶  
附種白納課子之數並乞除免

一臣所謂學糧田者蓋湖北兵戈之後沃壤彌望

人力不給凡請佃逃絕荒田官司初不打量畝步若人力有餘則逐歲四旁增墾其有沒官田產即是酒戶抵當或公吏等人犯罪沒納者田既籍沒則所種之客隨其地主又復他出頃年再興學校郡縣奉承括到沒官田便名學糧初無耕夫遂勒本保人戶分畝認米謂之附種學糧皆是與本戶田土不相連接農人不便耕墾例皆荒閒不免依數填納租課臣稽考縣籍長

林之安西鄉納學糧人一百二十三戶其一戶  
有田通計長林九鄉納學糧者共二百三十三  
戶其有田者纔三十五戶臣今若受人戶之訴  
除其無田之租則學糧遂空無以養士若循舊  
不恤勒令認租則細民苦之無時而已緣本軍  
並無承平案牘即不見得舊管贍學錢糧之數  
兼並無寺觀絕產可充贍學臣以愚見相度本  
軍長林縣歲催學糧沒官田米麥二百石有畸

而兩縣歲催常平戶絕田米麥八百石有畸臣  
竊計本軍目今之數除累年秋夏未接間出糶  
常平米接濟小民椿到錢一萬二千貫有畸糶  
補未足外其見管米一萬一千石有畸義倉所  
儲又在外本軍人戶稀寡設有水旱所費賑濟  
之數不多每年老疾乞丐之人亦甚少臣愚欲  
望聖慈許令本軍於長林縣戶絕田租內歲撥  
米麥各一百石以充學糧其附種之數并賜除

免自後沒官田如人戶願耕即以其所佃隸之  
常平二者既行則聖澤匝於阡陌遂見頌聲並  
作無田里愁嘆之心矣

一臣所謂麴引立法之意而重疊出鏹者在法  
諸鄉村去州縣二十里外有吉凶聚會聽人戶  
納錢買引於隣近酒戶寄造上戶納錢三貫造  
三石以其錢作朝廷封樁臣竊詳法意蓋謂民  
間有聚會之事親賓往來使之納錢買引則多

得酒醴公私有補而行法之久并緣為害凡逐  
縣就州軍請引至人戶投買之時縣吏視其物  
力多寡抑勒出錢致有十餘千者既已得引酒  
戶又復視其貧富勒令出錢亦有至十餘千者  
初未嘗得酒中下戶緣無力出錢買引遂有過  
期不成昏姻者其縣邑解發之錢未必一一皆  
到州郡封樁上下相蒙剝割生弊臣雖已禁約  
屬縣不得違法過數收錢及不得酒戶抑勒民

戶多出錢物外但賣引尚存則縣邑作弊難以  
一一幾察臣聞越勾踐欲其民之繁息令女子  
年十七不嫁者罪其父母今凋郡正欲生齒日  
增乃因麴引而使失昏姻之時實害聖政臣愚  
欲望聖慈咨詢大臣講求所以革弊之策或可  
刪除此法實天下幸甚

一臣所謂大禮代他州之貢而多方取辦者臣聞  
周之臣工助祭漢之列侯酎金各以其邦大小

任土作貢今湖外案牘不存遇大禮年分却令  
荊門軍代靖州進貢大禮銀二百兩絹二百疋  
又代峽州貢絹三百疋每疋折錢五貫文只於  
峽州得絹本錢二百八十五貫而本軍自有進  
貢銀絹各二百疋兩既小壘財賦不足如大禮  
年分不免東移西兌非民何所從出官府既無  
前牘可考若謂自承平以來二州之貢并是荊  
門代納則向來川廣湖湘入京皆取道荊門軍

馬項背相望實為富庶之地今則僻在一隅去  
水幾二百里非商旅所集最爾遺黎強名城郭  
臣今不敢并乞減免若以靖州雜於溪徭賦入  
稀少之時則本軍且乞為靖州依舊代納如峽  
州則有四縣已多於荆門一倍又川江舟楫之  
湊商稅所入非荆門比臣愚欲望聖慈許令荆  
門免納峽州貢物庶幾不使一壘而供三州之

賦

荊門應詔奏寬恤四事狀

臣伏觀紹興二十八年九月一日聖旨令郡守奉行寬恤指揮如有未盡事件條具聞奏臣到任未及三月民之弊害未能盡知仰體陛下焦勞仁民之心夙夜黽勉凡所以綏惠凋瘵瑣細必行不敢逐一塵瀆天聽其大者四事每歲公私取於民幾三四千緡臣雖各已蠲免若非朝廷禁止恐向後又復檢尋前例兼恐他郡亦有此弊欲望聖慈特賜行下如有違戾許民戶越訴庶幾

斯民永被德澤臣先次畫一開具須至奏聞者

一臣本軍每歲人戶秋苗有正稅米又有油麻豆粟雜色亦是折米近年受納官吏生弊將正稅米與雜折米令各作一鈔官倉則利於兩鈔畸零多收合耗而專斗則利於逐鈔各收糜費使用等錢上下侵漁比之舊年每歲多取人戶一二千貫臣已將紹興二十八年所納米每戶并併作一鈔只是畫件聲說名色及裁減使用錢

三分之二訖欲望聖慈特降指揮禁止以為永久之利

一臣本軍酒務及公使庫舊例遇正旦寒食冬至各印關子付居民令戶戶納錢赴官沽酒自一百至一貫軍城數百家每一節出錢二百貫只是畧得些小惡酒雖一家百金疑若甚微蓋凋郡難得錢物細民所居茅屋日出一間賃錢纔十二文而遇節頓出百金比屋為病臣自紹興

二十八年冬至以來已行蠲免訖欲望聖慈特降指揮禁以為永久之利

一臣本軍有獨石潭在江漢之旁產魚甚多舊以魚利添助支費昨緣改作放生池而本軍却將江潭下流強立地名謂之車湘灘上下堤楊子灘青木塌每戶雖不施網罟至冬月令縣尉追集沿江人戶將已前魚利之數均勒認納每歲得錢二百餘貫入公使庫臣已將紹興二十八

年合收錢並行減免訖欲望聖慈特降指揮禁止以為永久之利

一臣管下當陽縣每歲遇人戶納夏秋二稅并令先納嘗酒錢以家業多少為率自五百至三千雖賃地僑寄之戶亦令地主抱認凡一年兩次出錙幾及二千貫臣已榜示自紹興二十九年草絕訖欲望聖慈特降指揮禁止以為永久之利



盤洲文集卷四十九

欽定四庫全書

盤洲文集卷五十

宋 洪适 撰

章奏十

謝宣示御書臨帖狀

為大人作

伏蒙聖恩差中使宣示臣御書臨帖者宸翰昭回儼龍  
蛇之飛動使輶臨示驚奎壁之光輝拭目知榮撫躬有  
幸恭惟皇帝陛下體兼衆妙聖本多能天下無雙信義

之之北面帝中第一邁齊祖之前聞何取微臣獲窺睿藻已陋登牀之舉詎知肆筆之方忤蹈惟深鋪張莫究

徽州除浙西提舉赴闕奏方庚狀

右臣前因陞對嘗以幫源洞豪方庚奏陳猥蒙聖慈開納面得天語令便與大臣理會臣即日至樞府納劄子陳述曲折又以劄子薦其武勇可為土豪繼聞宰執奏事聖訓再三以臣管見為可採仰見聖慮深遠又以前車為戒臣竊恐朝廷尚未施行臣踈遠無識知恐愚者

一得之慮或有小補不避犯分之罪敢復言之臣聞封  
源四邊俱山險其中坦夷有田可耕居者甚衆方庚實  
為之桀聚族皆憚服之所欠朝廷一真命為重紹興二  
十四年李流知徽州日方庚以歲旱率其黨五十餘人  
至郡借糧本郡疑其為後患守臣接之廳事館之僧寺  
置酒郡圃以兵官主席又於教場閱習禁軍馳射令方  
庚觀之守臣囑其控制盜賊方庚欣然承命且云萬一  
要使喚之時只得一白帖權攝巡尉便當詣前其人黑

而長徽人謂之方庚三面稱之為保義衆人能言非臣  
敢為虛語前年嚴州草竊聞守臣亦嘗令攝威平寨官  
實欲羈縻之以此見得方庚志在官爵臣雖不得其聚  
兵實數傳者謂已有銀槍壹萬而三衙通卒頗亦亡命  
其間亦有弓矢轉相教習若天時無水旱內外無甲兵  
則此豈足置慮萬一疆場有驚其黨近在畿甸之內恐  
小有跳梁便相牽制為肘腋之害貽宵旰之憂臣謂軍  
興之際右列一命固不深繫名器之重若朝廷呼之觀

其人物語言果有可用處以密院一使臣名目小人易於感恩便可得其死力即是狙詐作使之術縱使萬槍皆出虛傳只得一方庾如土豪用之且令招集民兵使其果有徒黨便可化為王師隨其多少皆是得用於朝廷有利而無害臣已別具奏薦之乞賜行出伏望聖慈更留宸慮冒犯天威臣無任昧死

乞進賀誅敵將表奏狀

右臣狂瞽妄發不避斧鉞之誅上千天聽臣伏讀御製

完顏亮面貌贊有皇天降罰屢遷必敗之句於以見淵  
鑒垂光默契睿藻果騰吉語天下同慶臣竊見顏亮傾  
國入寇狂言指斥其志不小宸斷自天與天同符遣將  
出師動中機會社稷有靈元兇折首臣竊謂國家大慶  
莫此為比臣螻蟻愚見宜陳百官之班受四方之賀使  
遠邇播傳匝地呼舞奏告天地宗廟則神靈悅豫益降  
祉福然後光復舊京以示迴鑒之期推校千古無以比  
擬臣才短思澁不能著為雅頌以繼平淮磨崖之作謹

撰表文一函拜手投進尚慮朝廷未有指揮無因仰塵  
乙夜之覽伏望聖慈許賜進入干冒天威臣無任

條陳恢復事宜奏

正月四日准知樞密院行府劄子三省樞密院關樞密  
行府及楊存中等十二月一日黃旗奏報已殺金人完  
顏亮訖十二月四日三省樞密院同奉聖旨令樞密行  
府行下沿江諸太師監司帥守各條陳目今進討恢復  
事宜合如何施行具已見利害疾速聞奏送樞密行府

劄付提刑司遵依所降聖旨指揮火急條陳聞奏臣竊謂完顏亮傾國入寇蹂躪兩淮陸戰未嘗敗北其鋒初未易當天相社稷使之屠戮虜驚鳥散侵地復歸簞食壺漿遺黎延頸恢復之期真一機會但我師疲勞淮甸瘡痍糧食未豐民力凋瘵若乘時渡淮前途堅敵恐無後援或彼賊清野則饋餉不接却致上勤宵旰之慮今逆亮既殞大定即位未必諸國服從若能仰順天時遣使歸疆則王師不血刃而得土宇實天下之幸萬一彼

衆尚強自淮以北別無爭立之人則臣謂且宜多遣有  
膽力人密傳詔檄使中原義士各取州縣因以畀之王  
師但留屯淮泗募兵積粟以為聲援不必輕涉其地以  
務力爭俟蜀漢山東之兵數道俱歸見可而進遲以歲  
月必有機會可乘則恢復故地何啻破竹庶幾兵力不  
頓可以萬全謹錄奏聞繳進

太祖皇帝御書奏狀

右臣仰惟陛下天縱聖德同符藝祖留意軍政信賞必

罰沉幾獨斷與天為謀頃年先臣以使事久繫異域訪求於厘市之間換易於將帥之家前後所積凡得乾德開寶中御府編次太祖皇帝御筆數十卷其間有及軍政者雖數百之鏹五斗之粟一足之鱣亦勞宸衷為之節減至於遷補軍職招接降寨賜予衣襖下至油麵柴炭之屬區處塗竄委曲纖悉所以規模宏遠成無疆之業傳授至於聖神二百載而中天仰繩祖武重規再造臣昨日因宣召入對已嘗奏陳面奉玉音許令進入但

以表飾損舊臣不敢輒易亦欲見前此御府不為華飾  
務從簡樸如此今奎畫龍文復歸天上以備乙覽以助  
聖政蓋先臣寶藏之志也所有太祖皇帝御筆六卷謹  
隨狀繳進伏候勅旨

水災應詔奏狀

八月一日

臣今月一日准尚書省劄子七月三十日三省同奉  
聖旨政事不修災異數見江浙水滂有害秋成朕自  
八月一日避殿減膳思所以應天之實可令侍從臺

諫卿監郎官館職疏陳闕失及當今急務毋有所隱  
劄送臣者

右臣聞災變之發率多緣類而起漢儒一一牽合則有  
附會不經之失然理之當者亦不可因噎廢食而曲為  
之說臣謹按漢書五行傳云陰氣勝故其罰常雨水傷  
百穀姦軌並作魯莊公十一年秋大水董仲舒以為魯  
宋比年為乘丘郕之戰百姓愁怨陰氣盛故二國俱水  
厥後水災皆歸之兵興民怨所至國家自數載以來兵

民死於戎事肝腦塗地者不鮮父母妻子啼號之聲未絕也陛下有兼愛南北之心而獷狘變詐干戈未可得而戢今水不潤下江湖逆溢田疇溝澮與河渠連而為一已秀之禾不得而穫下民嗷嗷未生意官無積藏安得人人而飽之霖潦彌月勢猶未已陰氣可謂盛矣陛下畏天愛民至誠惻怛明詔廷臣使之盡言堯舜之用心也臣愚以為陰勝陽之沴遠人闕于外姦宄蟄於內也今外之所以待敵人者朝廷有潛算小臣不敢輕

議而區區愚慮竊恐季孫之憂不在顯史臣入對之始  
及輪進故事皆以歸正人為憂繼因晚召亦嘗奏陳仰  
勤天問矣數旬以來漸已萌芽臣幸因奉詔敢復詳言  
向之為美談者皆曰中原遺黎望王師之來則簞食壺  
漿願削左衽所以緼負而至又其思慕聖德之切者臣  
在江淮之間二年所聞殊異於是蓋山東仍年旱蝗耕  
者無所得食故扶老攜幼南來偷生又聞趙王世隆之  
徒聚衆攻剽彼國指名蹤捕亦以荒歲故牽連親戚相

率來歸其意蓋欲王師恢復因得乘勢橫行逞其所欲  
上可以得官爵次可以得金帛子女不失歸其故鄉既  
來之後大失素望更相嘆恨而將帥所部又役使詈辱  
無以得其驩心去復賈和仲以督府之令驅其孥累數  
萬口冒暑而來絕海遇風已葬魚腹而婦人老穉數百  
同舟蒸鬱相搏疾病枕籍死者不暇瘞埋既抵所屯雖  
計口給粟不能充飢愁怨之氣上干陰陽之和實在於  
此初到京口則掘山中草根以代蔬茹數月之後三五

成羣掇拾棄菜敗蘆於市廛之間其計無聊何以久處  
此臣目擊耳聞者如此其人之在山東皆有室廬南畝  
生生之具自若也今父子數口雜於方丈之舍上雨旁  
風無以蔽障甚者寢處於泥淖之內以他人視之不可  
一朝居也雖使禽鳥豈不思歸欲歸無計則姦軌之謀  
不得已而作今日誅甲明日誅乙必草艾獸獮然後已  
況邇來北方已有招納之榜又有誅誘之人其黨聚於  
江浙兩城散於淮甸諸郡去帝城不遠亦復有之一呼

相應特未艾也或曰叛者已治是大不然譬之急湍奔  
流勢必赴壑於其中間築土以拒之終於衝軼橫潰而  
止耳臣之管見以謂其人赳赳可用大勝江浙所募若  
使人給家足無飢寒匱乏之患樂補軍籍之缺誠為大  
利若其懷土不忘則宜優其歸費送以舟楫使之踰淮  
而去則可以窒患於未萌施恩於不報怨氣可弭天災  
可消或曰縱之使去不若遷之別壤以離其黨是又不  
然此輩捐生業棄墳墓遠來歸我亦招誘者誤之今遷

之別壤居上者誰有仁民之心官又無以贍之客居窮處速其死耳是無罪而殺之也可不念哉當今陰盛之患在外者猶可隨機而應在內者莫急於此蓋浙西非盜賊窟穴雖流徙困殍必無弄兵之事臣私憂過計伏望聖慈曲賜采擇而區處之至於譏切時政毛舉小事言而難行徒以沽名賣直則臣所不敢冒犯天威臣不勝戰汗

辭免中書舍人奏狀

今月二十五日准尚書省劄子三省同奉聖旨除臣中  
書舍人日下供職者臣聞命震驚罔知所措竊以班登  
禁密選貴西垣不獨掌行制書蓋亦與聞時政惟嫩才  
不至固陋庶繼溫純之詞必特操無所阿私乃振糾駁  
之職如臣者駑材何算鼠技易窮遇聰明睿智之君莫  
伸管見攝禮樂文章之事祇懼素餐屢叨稱獎之榮常  
賜清閒之燕坐文茵於帝所豈羨金蓮來捷步於日邊  
特盼珍茗比因宣召面諭恩除甫爾半旬有茲異渥遭

逢若此報稱謂何自知短絆之不能汲深或謂積薪而後來居上滿盈不戒顛越可憂伏望皇帝陛下俯矜螻蟻之誠曲寢絲綸之命俾安愚分得允僉言所有恩命臣未敢祇受謹錄奏聞伏候勅旨

舉自代奏狀

准令節文諸侍從官授訖三日內舉官一員自代者右臣伏覩左宣教郎太常博士兼權吏部郎官何稱種學績文蜚聲俊域使之掌制必有可觀臣實不如舉以自

代謹錄奏聞伏候勅旨

辭免奉使轉官奏狀

右臣今月十五日准尚書省劄子三省樞密院同奉聖旨洪某與轉行一官臣聞命震懼不知所措伏念臣備數從班常虞尸素方鄰國修好初講慶儀猥蒙選擇予節以行萬里往來曾無補報錫賜之物已慚虛受又叨進秩深所不安凡人臣事君東西南北唯命之從況兵鋒既息道路無壅不應以奔走微勞便受賞典伏望聖

慈追寢誤恩使免譏議冒犯天威臣無任

辭免除翰林學士奏狀

今月二十二日准尚書省劄子三省同奉聖旨洪某可  
除翰林學士兼中書舍人日下供職臣聞命震驚罔知  
所措竊以北門典誥所出西掖命令所行秩清地密必  
得其人然後可以處如臣者學問淺陋議論濶疎掌制  
踰年已試無取糾駁之職常恐曠瘼近者陛對伏蒙天  
語諭以翰長之除而又嘉其論事許令批勅臣誤辱眷

知方切悚懼敢期成命遂叨超拜內自循省代匱之久  
初乏才長仍兼故官則怨隙日增必致顛踣伏望皇帝  
陛下興憐駕蹇曲賜保全特寢異恩俾逃呵譴

舉自代奏狀

今月一日准告授前件職准令節文諸侍從官授訖三  
日內舉官一員自代者臣伏覩左文林郎主管尚書戶  
部架閣文字施元之學問該洽文采清新使居英俊之  
躔可脩翰墨之選舉以自代實允公言

盤洲文集卷五十

欽定四庫全書

盤洲文集卷五十一

宋 洪适 撰

申省狀 書

荊門軍論茶事狀

某近已條奏敷茶之弊而私憂過計又恐勘當不許以  
今年從便住賣之數立為新額只申嚴法禁行下則使  
斯民不需寬恤之實惠必不得已權時之宜不致虧失

經費又不重困民力使官民兼濟則某有愚見伏望鈞  
慈赦其狂瞽之罪某本軍見排造戶籍再三與民戶較  
量謂朝廷以寬恤為政若以利害申明必降指揮不許  
違法均數但恐客人遽失高價故意遏絕不來致令本  
軍虧折歲額欲行申請乞給降茶引本軍自行勸誘上  
等稅戶依客人入納官錢之數就軍買引自往鄰近土  
產處收買堪好真茶以實價分均食用咸謂若得如此  
施行民戶自往買茶免得虛費高價亦為民利某之狂

愚欲望鈞慈特賜減損荆門軍歲額以其數每年徑就  
提舉司請引至本軍從長招誘客人或民戶算請只依  
元引收頭子錢外更不別收勘合等錢俟至歲終本軍  
以其錢買銀付提舉司或鄂州總領司交納則於兩縣  
之民買引得茶之外每歲實減錢一萬五千餘貫此其  
為利不鮮如蒙從某所請乞自紹興二十九年為始俟  
指揮到日若春季已批發過客人鈔引乞許理作今年  
之數仍乞下提舉司於鈔引上朱批係是荆門軍算請

之引只得前來本軍住賣以免侵紊他州歲額兼乞下  
提舉司告示產茶去處除本軍朱批鈔引之外却不許  
別用客人他引批指前來本軍以免攙奪給降引數於  
法鈔引許留民間九年今既本軍人戶自行買引却恐  
當年未必便能一一買茶欲乞本軍每年只是趲納給  
到引價錢其住賣倒引乞隨逐年多少申繳庶使公私  
兩便如是向去戶口繁盛比及承平商旅通行見得從  
便可以趲額則乞許以後守臣申明朝廷自依常法更

不逐年給降又緣荆門小壘難得銀子尋常貢賦多是  
擔錢至荆南府買銀今每年至提舉司請引及管押人  
納銀有汭路脚乘等費若不立下些小糜費恐官司別  
無所出巧作名目因緣多取於民某面問民戶欲令每  
斤增收五文省作糜費使用皆稱情願出備若於外官  
吏別行增收取並乞計贓坐罪

復解額申省狀

本軍據軍學進士張禮等一百二十九人陳狀稱本軍

舊解額五人靖康元年范如圭任彥直高敷田幡然扈  
變同年發解范如圭見任利路提刑任彥直見任恭州  
監稅頃因劇盜以荆門為巢穴軍治鞠為荆棘人民死  
徙殆盡至紹興五年收復方以武臣作守驅除虎狼鳩  
合遺萌始有人煙至紹興七年省部會問靖康元年終  
場人數紐取立額其時本軍土人逃散未歸知軍胡修  
武不以儒生為意只就軍城據流寓陳天將供稱靖康  
年有二百二十人終場其年就江陵附試遂以四十四

人解發一人續後本軍士人漸歸却見解額人數異同  
遂於紹興二十一年經轉運司及本軍陳訴稱在承平  
時本軍初未曾及二百人終場之數蒙追問陳天將供  
稱係是應天府流寓人當來實不曾就荆門取應靖康  
年科場蓋是一時公吏且欲回報上司今天將妄亂供  
報所有本軍士人除建炎紹興之初兩次無人取應外  
紹興七年江陵府附試終場七人解發一名至紹興二  
十六年終場四十六人亦只解發一名今來士子蒙朝

廷養育作成垂三十年已及承平人數緣本軍去江陵一百八十里貧者乏於裹糧而幼者父母不容遠去遂使每次不能盡往赴試致見人數不增只以一人備數乞行申明復額某遂取責到本軍紹興二十六年鄉飲酒除疾患不赴人外有八十八人成禮並見今係籍學生共一百六人並會問到鄰近州府體例江陵府以省記到靖康元年數係十人七分取一人紹興七年終場五十二人解發三人紹興十七年終場一百六十六人

解發十一人已復舊額峽州靖康元年係八人取一人  
紹興七年終場二十人解發三人紹興十四年終場七  
十三人解發五人已復舊額歸州靖康元年係七人五  
分取一人紹興四年終場二十人解發三人紹興十年  
終場二十九人解發四人已復舊額復州靖康元年係  
十二人取一人紹興十年終場五人發解一人紹興二  
十六年終場三十人發解三人某檢照本軍公案有紹  
興二十一年內取責到靖康元年發解人高敷主簿供

稱當年終場係是六十五人並見存鄉貢進士丁庭瑞亦係靖康取應之人所供符同其陳天將供伏妄報文狀具在可考某切聞胡文定父子俱在荆門寄居故朱內翰之類遠來就學如朱內翰胡侍郎皆是荆門預薦登科所以荆門士人師授頗有淵源今既解額頓窄又附試他郡憚遠不能盡行致令薦送數損無以激勸有阻遠方士人進修之意某又伏覩紹興重修薦舉法備載紹興四年指揮緣淮南兩路無靖康元年終場之數

只比附泰州之數權立諸州解額每十三人解一人今  
湖北諸郡並是十五人以下解發一名不應荆門獨以  
四十餘人為額顯是多寡不均如江陵府只是憑據人  
吏省記立額本軍見存靖康發解取應之人可驗不誣  
已將會到諸州府解發人數錄白申納禮部準備取索  
照會訖謹具申尚書省伏望鈞慈憐念遠方士人乞將  
紹興二十九年科場比附本路鄰近州軍體例別賜詳  
酌改立解額行下

代上宰相書

某鹿鹿么膺至愚極陋蹤跡草芥顧不足進陳於帝師  
大丞相之前僥覬觀采之萬一然伏自思念在熙豐時  
曾門躋身綸闈勸講帝幄在政和時大門籠宇內之財  
為天子侍臣不肖之孫隕其家聲無可云者而天借之  
幸名結官牒猥受化工之賜漕臺鍾官游居部使者之  
屬雖翹材大館所以羅致英雋而最爾姓名得塵拔士  
之錄亦十有七年某也佩山嶽之施懷抄忽之報刻肌

鏤骨矢心自擔亦不敢輒處衆人之後退惟陽春播物  
草者莠者無不蒙被寵光吐葩賜榮動搖和風拱把之  
本根至於能蔭牛馬柔條弱蔓亦能上凌青霄發生之  
功何能遽數士於斯時託身鑪錘朝泥塗而暮雲漢造  
化之力與春等耳今欲軋滯思飾瑣說抒憔悴可憐之  
情顧小己區區之私夫何足以仰瀆威尊竊念窮而呼  
天理所必致捨恩門而不進一辭則鼠肝蟲臂何所自  
託耶重念某寅緣世及饕餮竊祿仕雖裘冶之緒不敢廢

而材智驚下不能見頴濫巾王官庇身大邑罷精耗神  
日懼奉職掾過不給蓬徙塵走幸終瓜戍得逍萬坐之  
罪而孥累猥衆退無負郭上腴可以耘耔代祿仰首搖  
尾希筆端膏澤庶幾復尋故步少逃州縣之勞以免溝  
壑之填仰惟某官天命隆棟為時宗臣衅甲歸馬泰山  
四維功業卓偉固已鏤景鍾書金匱非某赳赳所能鋪  
張梗概厥今太平無象物物遂性動植飛潛鼓舞覆燾  
之間遐邇耄穉共壤而擊豈門墻賤士不能澤吻一鳴

自求升斗之水是敢犯嚴肆言以累堦填冒觸等威某  
下情不勝戰灼待命之至

代上前執政書

某仰惟聖天子奮乾剛旋太阿尺一招賢慨乎如不及  
并謀兼智以濟登解絃上治自台鼎侍橐諫官御史臺  
郎儒館無有大小楹然一新鴻儀鷺序皆乙亥前幹棄  
沉淪之耆傑外而价藩近鎮亦暫屈舊老敷和蘇枯剡  
礪淄粃然後入都卿相之位恭惟某官以碩德垂典刑

以昌謨翼帷幄簡於細旃曄於汗簡舊矣蠅營醜正積  
年居東天日清明人人詹冀霖雨寄足方面寔儲巖石  
之望宜告舍人趣治相國裝行即召矣某才品凡下無  
尺寸逾人低徊塵瑱星終其二視王公大人如參辰麗  
天可望而不可親又安有覲顏色之溫侍謦欬之重者  
乎竊謂閣下鄉者西府遂持國秉則陽春膏澤可以窮  
垓匝宇而槐府潭潭某也雖欲下望塵之拜所不可得  
是閣下昔者之用乃天下之幸某之不幸也訪蘇耽之

仙跡上義帝之故城而某乃得與遐萌小吏企末光而承餘澤是閤下昔者之未用乃某之幸天下之不幸也今茲綸札鼎來使貂之袂相屬歸輔九五雍容槐楓之上退而謀國門牆尊嚴雖欲介郴陽之既見復邇秦階戛戛乎其難哉僥幸閤下撫封江右卓馬少駐某餬口番城距高牙一衣帶水幸之再來天也捨此時不干館人望履幕非鄙則病是敢促櫓絕湖超超與早下陳以覲鉅公一眄之榮若夫穆天緯經國體措天下泰山之

安則其規撫已素定閣下之胷府某一介愚瞽無以効  
渤海議曹之獻至於白涸輟之狀鳴負巫之賤又不敢  
墨筆搯牘諛諛以涸稜威伏惟閣下貫其罪而與其進  
焉干犯鈞嚴某下情不勝戰懼之至

與朱舍人書

某比獲撰屢辱賜南遷詩一編一百有四首自曲江過  
曹溪抵東衡州凡三日垂二百里右手執帙左手持轡  
目注心存哦誦乎齒吻不知林巒之所歷嚶哢之度耳

也昔屈大夫受讒於楚長吟澤畔離騷章句上追詩雅  
然桀紂羿澆等事反復致詳雲霓惡草之諷尤夥後之  
廢放者其寫悲寓懷之語必含怨刺雖韓退之為時宗  
師柳子厚文映古今猶有雙鳥訓狐之詩宥蝮螭螭之  
文中書丈人以贍學偉辭為甘泉望臣良筆婉遷董大  
冊落常揚遠徙曲江八變寒暑他人必憂懟亡聊日夜  
企而望歸我公乃買園葺亭培植自適一編之詩皆與  
諸郎快婿邦人之可語者投壺圍碁登臨所賦語工而

意和格高而辭樂無鬱鬱不平之氣芽於中而發於外  
也其賢於人如是夫豈久留此者耶某不肖不能窺見  
彷彿姑以所歎授園人持歸以獻

三省與金帥書

王忭來歸伏奉緘誨反復曲折備見勤誠玩味再三不  
勝欣荷伏惟元帥丞相為社稷之重臣兼將相之大任  
明良胥會言聽計行生靈休戚係乎轉盼皇帝仰奉兩  
宮俯憐赤子感大德尋盟之意捐棄細故務在曲從誓

書悉如來戒信使亦令啟行歲輸銀絹見已計置起發  
商州舊疆更不靳吝但以茲夏先歸四郡繼有渡淮之  
役今俟使命回程寢兵休士便行交割係虜之人即令  
有司刷會續當實告以遵嚴約無事繁辭歲律將周神  
明陰相躋民仁壽同享昇平垂譽無窮天下幸甚

三省與金帥書

比布訊緘遂勤誨牘風埃匱薄審閫制之賢勞神明扶  
持喜天休之滋至念二儀以好生為德蓋百戰者不祥

之兵修此齊盟出於初議中因曲見或為矛盾之言致  
此數年未講衣裳之會茲聆嘉報不替舊歡仰衛社之  
大忠感睦鄰之高誼已遵要束無復異同雖遠方有雙  
鯉之書豈彈情素使兩國若一家之子永戢仁私瞻邇  
惟深敷云曷罄

盤洲文集卷五十一

欽定四庫全書

盤洲文集卷五十二

宋 洪适 撰

啟一

謝試中詞學啟

追攀逸駕駑駘方困於奔馳推擇遺材瓦礫幸逃於沙汰既擢桂枝之秀更聯棣萼之華人以為榮已獨甚愧嘗謂昔人之學實期大道之明遠紹旁搜究聖哲行藏

之蘊博聞強識達古今治亂之原未嘗汲汲於功名寧復區區於文藝迨後世設章程而取士故諸儒追時好以謀身略與義以榛蕪既潢潦根源之失窺陳編而漁獵皆馥膏沾丐之餘故窮經淹貫者或拙於文而摘藻適麗者又短於學舉由一律疇克兩全愚賈操金遂見譏於書簾輕縑窘幅終莫擅於詞宗分轡並驅濫觴滋久惟昭代廣搜賢之路有詞科籠拔萃之才為異時翰墨之儲極一旦搢紳之盛是必撐腸拄腹該九丘八索

之遺言出脇穿心騁三都二京之殊軌夫能偶古作者  
茲可為時聞人如某者愚鈍亡長迂踈甚陋材既同於  
樗散性實肖於棗昏自家君有去國之行故幼歲失趨  
庭之訓瞻雲在望思學治之相傳歷日彌長懼析薪之  
弗繼雜綺襦而篋迹對縫掖以汗顏期自致於青霄遂  
力親於黃卷然舌耕莫之有得而腹藁終亦無竒窺豹  
一斑可笑管中之淺見食雞千跖漫尋紙上之空言雖  
非倚門牆而誦韓莊之書抑亦處畎畝而樂堯舜之道

落花點綴聊以自娛雌霓連蜺伊誰見賞悵榮名而尚  
邈慮素志之終違既不能脫一行吏籍之勞將何以慰  
萬里親庭之望決科孔易徒枉事於雕蟲作文不成殆  
何心於刻鵠遂捐舊業遽習殊科揚雄寧免於客嘲班  
固屢酬於賓戲甫臨勅敵轍廁俊游戴縱垂纓于于焉  
而來矣抽毫進牘憂憂乎其難哉搜石室之舊文擬玉  
堂之丕律成功曰頌慚周什之清風作器能銘媿郢歌  
之白雪記序不工於述事表章復拙於陳情方虞鼠技

之已窮豈意鴈行之並列獲紹滿籙之業遂逃飲墨之  
羞驟掇虛名敢自希於雙壁尚遺季弟終有慙於三珠  
顧此叨逾由夫幸會茲蓋伏遇相公中興名相間出真  
儒國勢既尊增大呂九鼎之重台躔有爛應秦階六符  
之光雖伊呂之佐無以加彼蕭曹之功不足進當君子  
長育之盛世推大臣教載之仁心遂至冥頑亦蒙甄採  
某敢不磨礱事業砥厲廉隅刻意讀書願入崔公之室  
銘肌報德敢荒陸氏之莊

闕

知舉直院給事受天英氣

名世真儒追渾噩以還醇極內相代言之美竭忠嘉而  
論事振東臺批勅之風懷推轂之仁心典揚衡之公選  
吞雲夢者八九既已包荒取武城之二三未嘗求備幸  
托粉榆之好漫成桃李之陰曾是冥頑亦蒙甄採缺叅  
政明堂梁棟清廟鼎彝遭聖主而上下交欣沛巨魚之  
縱壑有忠臣而姦邪不起凜猛虎之在山偉然百世之  
師卓爾萬夫之望當長育之盛世推教載之仁心遂致  
冥頑亦蒙甄採某敢不磨龍韋事業砥礪廉隅傾液漱芳

庶足三冬之用騁妍抽秘或推一日之長誓殫犬馬之  
誠少効珠環之報闕樞密明堂梁棟清廟鼎彝偉然百  
世之師卓爾萬夫之望發謀右府賴曲逆之腹心將命  
遐方得月支之要領每極招求之道曲懷推挽之心下  
同前

謝勅局進書改官啟

丁年諾仕瞻上相之後塵甲令奏篇玷中都之顯秩脫  
選調七階之冗綴朝班八品之華受賞非常歸恩有自

竊以策名委贄期風穴之高翔躡級限年覺天梯之難  
上反故紙而沉迷州縣之職懷漫刺則趙趙公卿之門  
然而玩歲居閒吏課鮮周於六考起家寡援薦書莫望  
於五章錄錄亡奇滔滔皆是書局素稱於捷徑士林咸  
指為清蹊雖曰便今著為律而疏為令不妨稽古誦其  
詩而讀其書至積久以成文復叨榮而更選欲重條章  
之出遂無資格之拘如某者襍線何長囊錐非顏假蔭  
始慚於高士立身期企於醇儒久勤陟岵之思常佩過

庭之訓斗南與對惟黃卷之聖賢江左相傳有青箱之  
家世偶殫薄技輒中異科幸結綬而登王畿免抗容而  
走俗狀備員公掾接武英游溢甫刑則除之初無鈎校  
之善取秦法之善者莫知櫟據之因逮三尺之克終誠  
萬分之何補絲綸錫命既仰拜於楓庭紳笏生輝若重  
登於桂籍茲蓋伏遇某官謀深挈國術妙取人王室中  
興雖一木獨成於大厦泰階相比於衆星同共於北辰  
方參朮芝桂以自資故管蒯絲麻而無棄遂令弱植亦

預優恩某敢不益厲遠圖更堅特操狗馬自度莫知酬報之方桃李不言盡託生成之賜

謝除秘書省正字啟

約法三章初乏刊修之善聚書四部遽叨是正之除仰拜恩私內深感懼切以垂槎問漢瞻東壁之文星結綬登畿列西崑之仙籍是稱美職以待勝流蓋將為選用之階故聊試校讐之事惟圖書之錯亂從古以然而籤牒之散亡於今尤甚幸昌代求遺之既廣致積年著錄

以寢全多魯論之二篇類皆紛糅脫酒誥之一簡詎免  
斷殘豕亥相傳銀根未定克稱厥任亦難其人如某者  
識智卑凡材資么庸伏周孔之軌躅雖欲自強慚游夏  
之淵源其如弗及每省鼠窮之技敢逃狗曲之嗤乃刻  
楮以偶成致吹竽而濫中脫州縣一行之吏裁國家三  
尺之文奏篇方冒於殊恩出綍復躋於華貫才非七步  
已無子墨之可稱學媿五車政恐雌黃之妄下遂竊登  
瀛之美更增入洛之榮接武英躔偶棣華之同列覃思

藝圃庶藜杖之分光自揆僥逾率歸推擇茲蓋伏遇某  
官經邦道備致主勛高巨艦濟川獨任維持之重大鈞  
播物曲全造化之工若富家兼積於膜腴故匠氏不遺  
於椽闌致茲瑣質得筵清途某敢不克己自修銘心圖  
報朝廷既正固無劉晏之憂書策在前遂畢李邕之願

台州通判回謝少卿啟

庀職鉛黃但索東方之米叨榮銀艾來題仲舉之輿敢  
借蔭於卿雲庶免愆於宦海恭惟某官材高百鷲名擅

一夔博物洽聞學周公仲尼之道同工異曲有相如揚  
雄之風蚤濟美於相門旋蜚英於仕路進陟冰廳之直  
有嘉綿蕝之儀漱石枕流方叢祠之燕養鳴玉曳履佇  
華貫之橫翔某久已仰高行將快覩未通名於記室已  
拜缺  
引領光塵譬草木君之味也服膺辭翰贈  
瓊瑤我何報之

賀朱提刑到任啟

伏審寵拜除書榮將使指方君行仁政務臻禁罔之寬

欲下無冤民尤遴憲臺之選僉言有愜刺部相歡恭惟  
某官象載垂光龍淵擢穎厲枕流於清節覽翔伋之德  
輝肅括洪深不言而備四時之氣沈浸醲郁所著皆約  
六經之文禮初答於鳴騶望遂諧於側席聊膺情於好  
爵即策足於要津開卷蓬丘下太一青藜之杖題興芝  
甸貳刺史銀菟之符中臺已歎於郎潛開館乃求於吏  
隱惟今涓部蓋列帝畿總一道三尺之權問七州六條  
之事疇咨明允來職平反出綍占星有赫光華之遣埋

輪撰日式先畏愛之傳靖民無取於呂刑居位已奔於  
晉盜攬轡何久賜環可期某赳赳小才倥侗晚出抗塵  
宦海初無一日之長借蔭卿雲幸有二天之託未能撰  
履敢問典籤

回錢簽判啟

伏審光拜宸恩榮司郡畫枉書郵之見及欣騎氣之鼎  
來伏惟某官材智高竒機神警秀過庭有詩禮之學傳  
家得忠孝之風久藉藉於芳猷盍駸駸於臚仕暫總六

聯之政俯參一幕之賓繼踵相因固棠棣青氈之舊信  
眉欲論稱芙蓉綠水之游拔擢可期挽留寧久某頃求  
補外來筮治中聆德惟勤將親仁於僚友効官有賴庶  
逃責於公家

賀錢運使到任啟

伏審光奉制書寵將使指一言寤意載嘉前席之陳九  
式均財遴揀外臺之寄僉諧胥慶剌部知歸恭惟某官  
養氣至剛知言有要清明內照考之皆有宮庭惻幅無

華渾然不見圭角惟家傳於忠孝宜世濟於功名方持  
焚波燥茗之權已見攬轡登車之志厥今制部實謂帝  
畿故繡衣計使之除即紫橐從臣之選比虛茲位始得  
其人欣出綈之占星聞埋輪之撰日一曰食二曰貨既  
知彊國之源流千斯倉萬斯箱更賴裕民之方略行將  
飾擢夫豈淹回某握蹠小才倥侗晚出抗塵宦海曾一  
日之無長借蔭卿雲幸二天之有託

賀李樞密啟

伏審顯拜恩綸進持幾柄當五百興王之名世光啟豐  
功惟二三執政以便民疇咨碩德除音既洽頌語允諧  
恭惟某官識遠而明氣剛以大宅英華於道秘淑芳潤  
於詞源殫見洽聞已貫穿於今古獨行特立不茹吐於  
剛柔掉鞅巍科振纓撫仕贊理官於聽棘游省戶而握  
蘭久陟都公式騫法從對溫顏於青瑣屢罄嘉猷承密  
旨於黃樞益隆瓌望果奉絲綸之寵遂登帷幄之崇南  
北兩朝方干戈之載戢東西二府宜文武以兼資更賴

贊襄共躋晏祭某鴈塔綴年家之好麟臺叨朝路之榮  
支郡庇身悅置郵之傳命台階矯首因筆墨以成文退  
惟贊喜之深深切瀆尊之懼

賀吳運使除直秘閣啟

伏審光拜渥恩進都顯職埋輪道上威方肅於外臺出  
綈廷中榮遂躋於內閣十連相慶萬口謂宜恭惟某官  
志度淵英宮庭高嶷探墳丘之古訓包川嶽之靈暉絕  
後光前惟琢磨於道德弼中彪外不茹吐於剛柔蚤負

遠猷益騰碩聞播弦歌於鳬舄贊筆削於鴻樞論議喟  
然風流藉甚熬波燥茗見有司將明之材輓粟飛芻懷  
天下澄清之志旣信眉於善類宜紮足於姦朋計定心  
君知所取而知所予望高膚使得其祿而得其名浸結  
上知式騫中秘有煥皇華之寵更隆刺部之權將朽貫  
於邦儲晉楚之富不可及也即翔纓於禁密管晏之功  
可復許乎某偶縛微官莫瞻崇儼速置郵而傳命喜氣  
惟深因筆墨以成文蕪音是懼

賀何中丞啟

伏審出綈楓庭振纓柏寺論諫皆本仁義夙著丹青吐  
茹不以剛柔聿分白黑除音四達僉允一同恭惟某官  
實大聲宏材全能鉅窮草木多聞之觀蹈詩書百家之  
言繡口錦心後學者有所統瑰意琦行諸大夫皆曰賢  
蚤得雋於巍科旋躋榮於拱著是正嘗來於藜杖校讐  
久對於雲籤六察奉公振山岳動搖之職一言獻可當  
國家閒暇之時即長諫垣有光從橐遇聖主和顏而納

誨故爭臣造膝以伸辭天下麒麟來表康朝之瑞人中  
屈軼益高指佞之名忠讜侃然功效卓爾迺峻籠街之  
寵遂隆專席之威風厲霜凝良藥少資於利病雲從霄  
瀚巨川行賴於作舟某稍濶光塵欣聞成命聊馳誠於  
削牘敢廢禮於司函

賀執政正旦啟

林鐘上生太簇實函鳳律之和攝提正於孟陬茲協龍  
躔之紀惟棣通於庶物宜萃聚於多祥恭惟某官道貫

孔門氣吞楚澤侍言帝幙叅二三執政之班發藻儒林  
當五百生賢之運履端於始降福孔皆某偶縛微官阻  
趨崇仞遙想頌花之列敢修行李之儀

賀兩漕進職陞副使啟

伏審深知自結異寵鼎來內閣聯榮益邃雲章之直中  
都改觀更崇星節之稱除目四馳歡心一律恭惟某官  
洪深置度茂粹凝姿學廣聞多友古人於千載材全能  
鉅備和氣於四時久將漕於王圻浸豐財於國帑振黜

否陟能之任得取盈散滯之方刺史問以六條威聲孔  
肅天下號曰八俊望實俱孚荐拜懋恩亟躋顯職仰使  
名之既正知朝著之有光雖屈皇華尚賴木牛之助即  
持從橐共期金馬之登某席庇偏州馳誠崇仞敢撫輿  
人之誦用塵執事之尊

賀湯運使到任啟

伏審命傳文陛寵陟計臺第二千石之治平無臣出其  
右者總十五州之飛輓有人然後充之刺部知歸僉諧

胥慶恭惟某官鳳麟嘉瑞川嶽靈暉學漸稽古之源才  
負康朝之畧自摘髭於上第旋策足於亨衢職業粹然  
聲華籍甚江淮草木知剖符持節之名雲海蓬萊寓磨  
槩懷鉛之直當近郡荐更於秕蠹故清朝遴東於賢能  
既千室之鳴弦果十行而賜札厥今漕部實古王畿惟  
繡衣使者之除即紫橐從臣之選占星出綵爭聞竹馬  
之迎諏日登車有賴木牛之助考夏疇於八政振漢制  
於六條善類信眉姦朋落膽連城帶邑問出入之錢穀

幾何足國裕民知取予則古今一也行將拔擢夫豈淹  
留某趣趣凡材倥侗晚出抗塵宦海初無一日之長借  
蔭卿雲幸有二天之託禮未伸於撰屢誠敢布於典籤

盤洲文集卷五十二

欽定四庫全書

盤洲文集卷五十三

宋 洪适 撰

啓二

賀何樞密啓

伏審寵傳鳳詔位陟鴻樞天子守在四夷方底修文之  
盛公輔間于兩社允資同德之良惟幄有光紳綏相慶  
恭惟某官人倫儀表天下中庸堯醵舜薰絕翰墨之蹊

逕周情孔思酌道德之淵源久歷通津荐居言責丹旌  
掌授書之柄絳騶揚清路之威志在擊邪如鷹鷂之逐  
鳥雀事先去甚當豺狼安問狐狸輟自南臺游登右省  
身享懷金之樂人歆執玉之榮簡求茲得于真賢康濟  
益隆于極治蓋一國之慕巨室為政不難惟三公上應  
台階斯拱而竢某竊觀除目偶抗塵容削牘傾心敢贊  
典籤之喜捉衿接武莫勤倒屣之迎

與交代石監丞啓

伏審瞻天拜命暫違金馬之班涓日治裝來佐銀菟之  
政搖心比屋企踵前騶恭惟某官量賦登閎識該貫變  
振魯叔復興之學讀黃童未見之書六翮高飛三科連  
中酌淵源于道德異乎綆短而汲深煥星斗之文章所  
謂芒寒而色正紙見洛陽之貴馬驚冀北之空既發穎  
于俊躔遂躋榮于華綴前主所是著為律爰筆削于金  
科三人同行必有師久範模于玉葉旋奉虎闥之寵共  
期鰲禁之游何挺特之英姿顧翱翔于半刺雖山登桐

柏有仙跡之可尋而社接粉榆宜民情之素習政恐賜  
環之趣不成煖席之期某一別瑤林五遷緹籥詞壇給  
札嘗叨采菲之蕪收郡壘題輿不意積薪而居上况甲  
族有親享之舊復周行依蔭樾之餘逮茲糠粃之揚實  
賴瑾瑜之匿披承云邇欣愜惟多更嗇冲襟益叢嘉祉  
答謝將仕投贄狀

講聞雋譽願挹令儀辱謙收以光臨賁牋函而下問雖  
成蠅誤墨昔嘗被羽以先登而得魚忘筌無復傾圉而

羅進益媿瓊瑤之報第榮錦繡之藏

謝人投所業狀

比辱光臨寵詒雅製抽琴命操詎知山水之音下筆成章有辱瓊瑤之報

謝人惠生日詩啓

特勤都騎寵賁佳篇牛斗不神媿名聲之何有參辰相比觀光燄以非常退惟褒拂之私良積感藏之厚

謝人惠生日詩狀

男子占熊羆之祥猥勤齒錄美人贈錦繡之段益賁身  
榮方下拜于絨封將永藏于巾衍

賀胡提舶啓

伏審疏榮細札拜職輜軒傳聲五嶺之南講德百僚之  
上恭惟某官軼材兼美達識不羣抱圭璧之瓊華探簡  
編之輿府久居別駕深鬱遠圖茲奮迅于星輶來典司  
于浪舶惟犀象珠璣之湊置使匪輕非山林川澤之饒  
輸公有限必賴筭鞭之智自多航海之珍僉曰得人可

以利國第恐注思于宣室靡容留憩于外臺某夙仰光  
塵未親謦咳豈期留落于此乃得悵懔之依敢寓意于  
書郵庶聞名于記室

回廣州羅通判啓

伏審授命監州治裝隄領咸驤眉于英矩已傾耳于先  
聲伏惟某官學擅紛綸才誇典麗嘗因野鵬而作賦復  
為仙羊而拜官荐屈題輿不辭叱馭來康南海少煩別  
駕之功入拱北辰高應列星之位某暫緣攝事將獲承

顏書記翩翩愧報章之不敏行邁靡靡願旅食之益調

賀饒州洪郎中啟

伏審眷深前席寵拜左符燕寢棠陰方畫戟新臨于風  
月螺州芝嶺皆繡衣舊領之山川初布教條遠聆謳頌  
恭惟某官書輕倚相識博胥臣超卓見聞東春秋之五  
傳增多訓故說離騷之一經網羅闕里之蟬嫣是正昌  
黎之魚魯沛然學問藉甚聲名開天祿之陳編光分太  
一賜隄靡之佳墨文應列星廼持刺舉之權常奏平反

之策賣劍正傳于淮甸夢刀復至于江城召王褒而作  
詩將聞宣室見蓋公而問治欲避正堂即有褒綸入叅  
禁橐某睽違之久慕仰益深頃講宗盟不棄他楊之謀  
茲叨河潤尚稽維梓之恭歲事向闌郡章多暇願謹鼎  
裊之節益隆襟履之休

賀肇慶劉守啟

伏審疏榮象闕作鎮龍藩瓜戍指期允協東龜之吉棠  
陰留景已傳今袴之謠恭惟某官至德中庸大雅宏達

圭璧豈迷邦之寶梗枏推聳壑之材蚤馳問于朝端復  
承流于嶺表揚仁風于贈扇來福遐萌沛甘雨以隨車  
遠追前躅即聞異政遂下褒綸某甫間芝眉密叨樾蔭  
揚衡賓閣莫瞻五馬之尊寓意管城奚報雙魚之遺

回鄭德慶啟

伏審承榮鳳闕宣化龍藩時望允歸風謠立振恭惟某  
官襟靈磊落知略高明豫章呈聳壑之材大呂擅尊朝之  
器久潛宦海連把州麾硯臺方選于一錢錦石又歌于

五袴鹿効祥而夾轂不墜家聲犢務本以賣刀益崇治  
行即聞褒召遂陟通階某頃際英躔獲親清誨驤眉畫  
戟何因樂霧之披寓意短絨莫報郇雲之賜

回曾解元狀

鑒鋒筆陣彼烏敢當我哉造勝文場無能出其右者鄉  
評允愜儒黨有光先輩積思三都馳芬五嶺充牣簡編  
之讀優游翰墨之林文最善鳴白也詩固無敵言多實  
用誼之策豈略行瞻鴈塔之崢嶸指鵷行而騰翥肯迂

逢掖見賁長賤某久矣講聞欣然諧際攝空泮水獲聞  
擲地之聲遠迹瀛洲莫快如牆之覩

回侯解元狀

爭鋒筆陣日五色以齊驅造勝文闡心三星而著象聲  
馳粉社喜動蘭陔先輩韶濩諧音榷枏聳榦學周公仲  
尼之道特立獨行有相如揚雄之風同工異曲不輟夜  
分之習素高月旦之評果得雋于槐黃將策勲于芥紫  
章章鴈塔衮衮鴈行某舊矣知名是然識面攝空未幾

初非一卷之師按藻肯臨深愧雙金之報

回戴解元狀

爭鋒筆陣少陸機作賦之年造榜文闡冠王勃齊名之  
傑聲馳里社喜動親庭先輩囊穎有聞席重是似平時  
妙童子之作既擅價于彫蟲一日中有司之程果賞音于  
雌霓不負槐黃之舉能收竹素之功唾手巍科致身榮  
路某久欽警悟幸際清揚暫爾攝空弗補撞鐘之問惠  
然摘藻有慚報玖之章

回傳解元狀

竊審席珍長圃副嘉詔之詳延造榜外臺占賢書而獨步他鄉改觀吾黨垂光先輩賦麗孔門氣劇屈壘果見舊藁之得不負短檠之勤出月脇以蜚聲一枝可折振風翰而借便萬里為程某項幸承顏欣聞中的遂迺方履見詒金薤之辭不腆報章有愧木桃之什

代人謝鄭漕舉改官啟

贊赤側三官之事浸及終更受皇華四牡之知頓增倍

價感藏心石喜動背芒竊以鳥有鳳而獸有麟咸知為  
瑞木在山而馬在肆孰辨其良惟真賢司藻鑑之公故  
後進得併懽之託然錦心繡口者或有山川之險而蠟  
言梔貌者曷分珉玉之殊狐裘反衣而有之柏舟不遇  
亦多矣取人失之子羽何以得才草奏不如陳湯艱哉  
知已謂予不信從古以然如某者馬走質凡雞尸用小  
自保歲寒之質未高月旦之評非韞櫝以求沽何席珍  
而待聘徘徊九品幾韓子之無歸坎壈十年真釋之之

不調偶銅山之設屬致菽水以承親刺史部州十三自  
慚黃綬城南去天尺五莫借丹梯初無鶩鶩鵷雛之稱  
安得蚍蜉蟻子之援豈期內舉獲廁下陳某官濟美相  
門攀芳聖域專繡斧振威之任紹緇衣好賢之宜君子  
存心既埋輪安問當路執事過聽乃推轂缺未缺何  
知桃李之陰近在瓜葛之末某敢不服膺吏道律已官  
箴巢寄一枝不作南飛之鵲印垂三組庶同反顧之龜

代承務郎謝梁侍郎舉陞陟啟

曳裾求見偶志目而中眉列牘受知遂鑽皮而出羽有  
識相慶無言可酬竊以國家崇紫橐之班三年使之延  
賞銓選厄綺襦之路五官然後陞朝已離竹馬之遊真  
作土牛之鈍歷倉氏庾氏之職至于再三合社郎廟郎  
之員動以千百抗塵竟走于俗狀累日未離于小官惟  
寸進之艱難曷丈量其長短黑頭年少誰稱飢座之梨  
白脚門生寧望迎霜之兔儻非論薦孰得甄升如某者  
蟠木棄材猗苓下品學未知于習是文不造于紬竒良

治為裴莫繼槐花之舉尚書給札空慚棣萼之編猥以  
門資廁于仕版已分為國舍虞比之伍見譏于封胡羯  
末之間敢希敝帚之千金自嗟駕馬之十駕才不才各  
言其子方景行于芝蘭幼吾幼以及之人遂兼收于葑  
菲寵踰意表喜溢顏行某官江左興王之臣山東相國  
之種龍返鄉而蛇得路首佐命以負羈魚縱壑而鴻遇  
風久論思而簪筆進人將加諸膝慕才而貴其身分濁  
涇清渭之源賞流水高山之志何期刻畫亦及盤跚某

敢不劇目囊箱將心刀篋有絲麻無棄管蒯仰戢謬恩  
投桃李報之瓊瑤誓堅後効

代徽州尉上太守啟

仕而求祿腰黃綬以遵期我獨有天目朱幡而結想將  
承顏于旦暮敢問訊于寒溫伏念性不逮中技惟每下  
久焚膏而繼晷非藏器以待時鯉退學詩恐墜過庭之  
訓孔門用賦妄希入室之工屢踏槐花晚穿楊葉脫白  
丁而釋躋齒黃甲以彈冠方塵九品之微復占百僚之

底一行作吏未伸北部之威三釜及親獨喜南陔之養  
問津茲始勾庇甚優恭惟某官識冠倫魁學窮淵奧珠  
藏壁韞曠千載而流光鯤化鵬飛搏萬里而直上未登  
金馬聊佩銅魚惟大賢無所不容故小人恃以不恐悝  
蒙有賴捶楚可逃敢不律已官箴游心吏道牛刀而割  
雞未用敢希顏籀之風鶚薦而累鷺不如尚冀孔融之鑒  
又迎新守趙監丞啟

紫禁疏恩榮佩左符之重朱轡戒道聿嚴前弩之迎老

稚知歸封圻改觀凡叨屬吏倍激懽悰恭惟某官川嶽  
靈輝鳳麟嘉瑞出神明之貴胄負標的之清規德備忱  
恂獨樂東平之善學該貫變盡讀河間之書蚤掇魏科  
浸躋臚仕自典尚方之職益宏大雅之休肆外閤中論  
議冠諸宗室光前絕後名聲顯于朝廷暫違金馬之班  
荐荷銀菟之寄治裝伊始流化有期幸此大州得依慈  
父雖叔度之來何暮式佇袴襦胡陸君之去不留第光  
衣佩使幼女復興于孝行豈小人敢致于私情遠紹昔

賢政在今日恐棠陰之未久即芝檢之鼎來某趨起凡  
姿倥侗晚出賦鼠窮之短技守狗曲之淺聞屢踏槐花  
偶穿柳葉初占百僚之底未闌三尺之從仰恃悒悒庶  
逃捶楚信眉自慶將逢流水之知引領方勤佇快青天  
之覩

代齋長見新教官啟

仰如北斗夙裝蹈景之懷志在高山將遇知音之聽敢  
修尺楮庸布寸心伏念某胄本單平稟非奇卓夏絃春

誦空坐對于短檠朝薤暮鹽幾悲歌于長鉞溯閩川而  
泛梗樂鄴水以采芹濫陪講說之儔茂有切磋之善中  
焉行役遯矣滯留復尋仲蔚之居已失邯鄲之步處齋  
房之前列曷足長人直橫舍之攸司猥令代匱方趁槐  
黃之舉妄希芥紫之榮欣哲匠之鼎來冀碩姿之速肖  
大衍掛一庶窮犧畫以東歸宵雅肄三或俟鹿鳴而西  
笑夫何僥倖有此際遭恭惟某官學博五車文兼千彙  
燕之角荆之幹獨擅美材湯作護舜作韶宜薦清廟屢

鼓詞聞之氣益馳藝圃之名驚大器之晚成快景星之  
爭覩廣庭首唱諸老先生未能言便坐口談當時弟子  
有所記三歎坐氊之冷久期朝席之重即有褒綸入躋  
華綴遂袞袞青雲之上豈鬱鬱絳帳之間尚容負笈而  
前少遂撞鐘之叩某自鞭十駕願反三隅問鑄金得鑄  
人已獲求師之益若食雞必食跖終收善學之功

盤洲文集卷五十三